

四庫全書

集部



欽定四庫全書

臨川文集卷五

宋 王安石 撰

古詩

和吳御史汴渠

酬王詹叔奉使江南訪茶利害

酬王伯虎

答虞醇翁

送潮州呂使君



寄曾子固二首

虎圖

次韻信都公石枕蘄簟

和吳沖卿雪

和沖卿雪詩并示持國

送石賡歸寧

送張拱微出都

寄題睡軒



沖卿席上得作字

塞翁行

白溝行

河間

陳橋

澶州

和吳御史汴渠

鄭國欲弊秦渠成秦富疆本始意已陋末流功更長維



汴亦如此浚源在淫荒歸作萬世利誰能弛其防夷門  
築天都橫帶國之陽漕引天下半豈云獨荆揚貨入空  
外府租輸陳太倉東南一百年寡老無殘糧自宜富京  
師乃亦窘蓋藏征求過夙昔機巧到蓬芒御史閔其然  
志欲窮舟航此言信有激此水存何傷救世詎無術習  
傳自先王念非老經綸豈易識其方我懶不足數君材  
仍自強他日聽施設無乃棄篇章

酬王詹叔奉使江南訪茶利害



余聞古之人措法貽厥後命官惟賢材職事又習狃止  
能權輕重王府則多有豈嘗權其子而為民父母當時  
所經營今十已毀九其一雖幸在漂搖亦將朽公卿患  
才難州縣固多苟詔令雖數下紛紛誰與守官居甚傳  
舍位以聲勢受既不責施為安能辨賢不區區欲抹弊  
萬謗不容口天下大安危誰當執其咎勞心適有罪養  
譽終天醜豈惟祖子孫教戒及朋友貴者大其領詩人  
歌四牡至尊空獨憂不敢樂飲酒哿矣富阡陌哀哉此



無糗鄉閭人所懷今或棄而走豈無濟時術使爾安畎  
畝故今二三公戮力思矯揉永惟東南害茶法蓋其首  
私藏與竊販犴獄常紛糾輸將一不足往往死鞭杻販  
陳彼雜惡強賣曾非誘已云困關市且復搔林藪將更  
百年弊謂民知可否出節付羣材詢謀欲經久朝廷每  
若此自可躋仁壽因知從今始漸欲人財阜吾宗恢奇  
士選使自朝右聰明諒多得為上歸析剖王程雖薄遽  
邦法難鹵莽願君博諮諏無擇壯與耆余知茶山民不



必生皆厚獨當征求任尚恐難措手孔稱均無貧此語  
今可取譬欲輕萬鈞當令衆人負強言豈宜當聊用報  
瓊玖

酬王伯虎

吾聞人之初好惡尚無朕帝與鑿耳目賢愚遂殊品爾  
來百千年轉化薄愈甚父翁相販賣浮詐誰能審睢盱  
猴纓冠狼藉鼠穴寢滄海恐值到誰論魚鼈淦鴉聲雖  
云惡草去在食甚嗟誰職教化獨使此風稔恬觀不知



救坐費太官廩予生少而戇好古乃天稟念此俗衰壞  
何嘗敢安枕有時不能平悲吒失食飲唯予同我病亦  
或涕沾衽謂予可告語密以詩來諭爛然辭滿紙秋水  
濯新錦窮觀何拳拳靜念復凜凜賤貧欲救世無寧猶  
拾瀋說窮且版築尹屈惟烹飪逢時豈遽廢避俗聊須  
噤徂年幸未暮此意可勤恁

答虞醇翁

輟學以從仕仕非吾本謀欲歸諒不能非敢忘林丘臨



餐恥苟得異以盡心疇萬事等畫墁雖勤亦何收揚揚  
古之人彼職乃無憂感子撫我厚欲言祇慙羞

送潮州呂使君

韓君揭陽居戚嗟與死隣呂使揭陽去笑談面生春當  
復進趙子詩書相討論不必移鱣魚詭怪以疑民有若  
大顛者高材能動人亦勿與為禮聽之汨彞倫同朝叙  
朋友異姓接婚姻恩義乃獨厚懷哉余所陳

寄曾子固二首



嚴嚴中天閣藹藹層雲樹為予望江南蔽虧無行路平生湖海士心迹非無素老矣不自知低徊如有慕傷懷西風起心與河漢注哀鴻相隨飛去我終不顧

二

崔嵬天門山江水遶其下寒渠已膠舟欲往豈無馬時恩終拘綴私養難乞假低徊適為此含憂何時寫吾能好諒直世或非詭詐安得有一廬相隨問耕者

虎圖



壯哉非羆亦非貙目光夾鏡當坐隅橫行安尾不畏逐  
顧盼欲去仍躊躇卒然我見心為動熟視稍稍摩其鬚  
固知畫者巧為此此物安肯來庭除想當槃礴欲畫時  
睥睨衆史如庸奴神閑意定始一掃功與造化論錙銖  
悲風颭颭吹黃蘆上有寒雀驚相呼槎牙死樹鳴老烏  
向之俛喁如哺雛山牆野壁黃昏後馮婦遙看亦下車

次韻信都公石枕蘄簟

端溪琢枕綠玉色蘄水織簟黃金紋翰林所寶此兩物



笑視金玉如浮雲都城六月招客語地上赤日流黃塵  
燭龍中天進無力客主歎然各疲劇形骸直欲坐棄忘  
冠帶安能強修飾恃公寬貸更不疑箕倨豈復論官職  
笛材平瑩家故藏硯璞物清此新得掃除堂屋就陰翳  
公不自眠分與客知公用意每如此真能與物同其適  
豈比法曹空自私却願天日長炎赫公才卓犖人所驚  
久矣四海流聲名天方選取欲扶世豈特使以文章鳴  
深探力取常不寐思以正議排縱橫奈何甘心一榻上



欲卧頽尾為潔清賢愚勞佚非一軌顧我病昏惟未死  
心於萬事久翛然身寄一官真偶爾便當買宅歸偃休  
白髮青山如願始看公勦力就太平却上青天跨箕尾

和吳冲卿雪

陽回力猶遭陰合勢方輦填空忽汗漫造物誰慙通輕  
於擘絮紛細若吹毛氄雲連晝已替風助宵仍洵憑陵  
雖一時變態亦千種簾深卷或避戶隘闕猶擁滔天有  
凍浪匝地無荒隴飛揚類挾富委翳等辭寵穿幽偶相



重值險輒孤聳積慘會將舒羣輕那久重紛華始滿眼  
消釋不旋踵槁樹散飛花空蒼落縣渾還當困炎熱以  
此滌煩壅共約市南人收藏不為冗

和沖卿雪詩并示持國

地卷江海浮天吹河漢湧北風散作花巧麗世無種霾  
昏得照曜塵滓歸掩擁荒林無空枝幽瓦有高隴分纔  
一毛細聚或千鈞重飛颺窺已眩摧壓聽還亮漁舟平  
繫舷樵屨沒歸踵空令物象瑩豈免川塗壅爭光姮娥



妬失色義和恐賴逢陽氣烝轉作水波溶舞庭稱賀嚴  
掃路傳呼寵衝遊謝壯少避卧甘閑冗吳侯絕俗唱韓  
子當敵勇勝負觀兩豪吾衰但陰拱

送石賡歸寧

虛名誤長者邂逅肯經過所操十餘篇浩蕩決江河側  
身朝市間樂少悲慙多文章舊所好久已廢吟哦開編  
喜有得一讀瘳沈疴裹飯北城陰永懷從晤歌又欲及  
歲晚空堂掃絲窠稍出平生言道藝相琢磨忽隨鴈南



飛當此葉辭柯去去去  
黎嶺高想見青坡陀  
黃花一杯酒  
為壽樂如何  
微詩等瓦礫持用報隋和

送張拱微出都

歸卧不自得出門無所投  
獨尋城隅水送子因遠遊  
荒林纏悲風慘慘吹馳裘  
捉手共笑語顧瞻中河舟  
嗟人皆行樂而我方坐愁  
腸胃繞鍾山形骸空此留  
念始讀詩書豈非亦有求  
一來裏青衫觸事自悔尤  
誤為世所容榮祿今白頭  
塞責以區區一毛施萬牛  
不足助時治



但為故人羞寬恩許自劾終欲東南流子今涉冬江船  
必泊蔡州寄聲冶城人為我問一丘

寄題睡軒

劉侯少忼慨天馬脫羈羈一官不得意州縣老委蛇新  
居當中條牆屋稍補治疏軒以睡名從我遠求詩朝廷  
法令具百吏但循持又况佐小邑有才安所施賦租如  
簿領獄訟了鞭笞翛然即高枕於此樂可知王官有空  
谷隱者常棲遲拂榻夢其人亦足慰所思嗟予久留連



竊食坐無為浩歌臨西風更欲往從之

沖卿席上得作字

咨予乏時才始願乃丘壑強走十五年朱顏已非昨低  
回大梁下屢歎風沙惡所欣同舍郎誘我文義博古聲  
無惱淫真味有淡泊追攀風月久貌簡非心略君恩忽  
推徙所望頗乖錯尚憐得經過未比參辰各留連惜餘  
景從子至日落明燈照親友環坐傾杯杓別離寬後悲  
笑語盡今樂論詩知不如興至亦同作



塞翁行

塞翁少小壘上鋤塞翁老來能捕魚魚長如人水滿眼  
桑柘死盡生芙蓉漢家新堤廣能築胡兒壯馬休南牧  
北風卷却波浪聲祇放田車行輾輾

白溝行

白溝河邊蕃塞地送迎蕃使年年事蕃使常來射狐兔  
漢兵不道傳烽燧萬里鉏耰接塞垣幽燕桑葉暗川原  
棘門灞上徒兒戲李牧廉頗莫更論



河間

北行出河間千歲想賢王胡麻生蓬中詰曲終自傷好  
德尚如此恃材宜見戕乃知陰自脩彼不為傾商區區  
三世家廟冊富文章教子以空言得祚果不良


陳橋

走馬黃昏渡河水夜爭歸路春風裏指點韋城太白高  
投鞭日午陳橋市場楊柳初回陌上塵胭脂洗出杏花勻  
紛紛塞路堪追惜失却新年一半春



澶州

去都二百四十里河流中間兩城峙南城草草不受兵  
北城樓櫓如邊城城中老人為予語契丹此地經鈔虜  
黃屋親乘矢石間奮馬欲踏河水渡天發一矢天狼愁  
河水亦破沙水流歡盟從此至今日丞相萊公功第一





臨川文集卷五



欽定四庫全書

集部

臨川文集卷十

詳校官庶吉士<sub>臣</sub>龍廷槐

檢討<sub>臣</sub>何思鈞覆勘

覆校官中書<sub>臣</sub>呂雲棟

校對官主簿<sub>臣</sub>汪日贊

謄錄監生<sub>臣</sub>張紹鼎



欽定四庫全書

臨川文集卷六

宋 王安石 撰

古詩

北客置酒

奉使道中寄育王山長老常坦

送李屯田守桂陽二首

送吳仲庶出守潭州

雜詠三首



即事三首

送鄭叔熊歸閩

寄二弟時往臨川

李氏沅江書堂

休假大佛寺

別謝師宰

解使事泊棠陰時三弟皆在京師二首

驂騑



寄朱氏妹

贈陳景初

贈張康

送程公闢守洪州

鳳凰山

夢中作

彭蠡

牛渚



東門

和王微之登高齋三首

北客置酒

紫衣操鼎置客前  
巾韝稻飴隨梁饘  
引刀取肉割啖客  
銀盤擘臠薨與鮮  
殷勤勸侑邀一飽  
卷牲歸館觴更傳  
山蔬野果雜飴蜜  
攏脯豕腊加魚煎  
酒酣衆史稍欲起  
北客捫耳爭留連  
為客止飲且少安  
一杯相屬非偶然  
奉使道中寄育王山長老常坦



道人少賈海上游，海舶破散身沈浮。  
抱金滿篋人所寄，吹簸偶得還中州。  
羸身歸金不受報，祇取斗酒相獻酬。  
歡娛慈母終一世，脫棄妻子藏巖幽。  
蒼煙寥寥池水漫，白玉茁茁吹高秋。  
夜燠栢子煮山藥，憶此東望無時休。  
塞垣春枯積雪溜，沙礫盛怒黃雲愁。  
五更匹馬隨鴈起，想見鄮郭花今稠。  
百年夸奪終一丘，世上滿眼真悠悠。  
寄聲萬里心綢繆，莫道異趣無相求。

送李屯田守桂陽二首



泊船香爐峯始與子相識寄書邦江上詒我峯下石緣  
以湘水竹携持與南北永懷故人歡不願百金易竹枯  
歸樵蘇石爛棄沙礫夷門得邂逅綠髮皆半白追思少  
時事俛仰如一夕老矣無所為空知念疇昔常思一杯  
酒要子相解釋出門事紛紛歸卧意還矧聞當上湓水  
持詔守嶺阨方為萬里別執手先慘戚茲游信浩蕩山  
水多所得為我謝香爐風塵每相憶



蒼黃離家問南北中路思歸歸不得風濤何處不驚人  
雨雪前村更欺客舊交旌旆此盤桓見我即令兒解鞍  
荒山樂官歌舞拙提壺沽酒聊一歡行藏欲語眉不展  
互歎別離心繾綣行年半百勞如此南畝催耕未宜晚  
送吳仲庶出守潭州

吳公治河南名出漢廷右高才有公孫相望千歲後平  
明省門開吏接堂上肘指撫談笑間靜若在林藪連牆  
畫山水隱几詩千首浩然江湖思果得東南守傳鼓上



清湘旌旗蔽牛斗方今河南治復在荆人口自古楚有  
材鄙渌多美酒不知樽前客更得賈生否

雜詠三首

懷王自墮馬賈傳至死悲古人事一職豈敢苟然為哭  
死非為生吾心良不欺滔滔聲利間絳灌亦何知

二

先生善鼓瑟齊國好吹竽操瑟入齊人雅鄭亦復殊豈  
不得祿賜歸卧自歛歔寥寥朱絲絃老矣誰與娛



三

商陽殺三人每輒不忍視亦云食君食報禮當如此波  
瀾吹九州金石安得止永懷南山阿慷慨中夜起

即事三首

我起影亦起我留影逡巡我意不在影影長隨我身交  
游義相好骨肉情相親如何有乖睽不得同苦辛

二

昏昏白日卧皎皎中夜愁明月入枕席涼風動衾幃蒼



蟬相鳴悲上下無時休徒能感我耳顧爾安知秋

三

日月隨天旋疾遲與天謀寒暑自有常不顧萬物求蜉  
蝥蔽朝夕蟪蛄疑春秋眇眇上古歷回環今幾周

送鄭叔熊歸閩

鄭子喜論兵魁然萬人敵常持一尺箠跨馬河南北方  
今邊利害口手能講畫疑師穀城翁方略已自得天兵  
卷甲老壯士不肉食低徊向詩書文字銳鐫刻科名又



齟齬棄置非人力黃塵彫蜀裘逆旅同偪仄秋風吹殘  
汴霰雪已驚客浩歌隨東舟別我無慘惻閩生今好遊  
往往老妻息南陔子所慕天命豈終塞

寄二弟時往臨川

蕭條冬風高吹我冠上霜我行歲已寒悲汝道路長持  
以一作此犬馬心千里不得將使汝身百憂辛苦冒川梁

青燈照詩書仰屋涕數行不有親戚思詎知遠遊傷

李氏沅江書堂



沅江水有梁與冒沅田樹桑可蠶耕君於其間恥射利  
獨岸清泚留朱甍詩書當前日開闔冠帶滿坐相逢迎  
勉求高論出施設無以私智為公卿

休假大佛寺

罷憊得休假衣冠倦趨翔挾書聊自娛解帶寺東廊六  
龍高徘徊光景在我裳冬屋稍暄暖病身更强梁從我  
有不思捨我有不忘問誰可與言攜手此徜徉婉婉吾  
所愛新居乃鄰牆寄聲能來遊維用寫愁腸



別謝師宰

閭闔城西地如水雞鳴黃塵波浪起窮年一馬望扶桑  
東得省門身輒止簿書期會老紛紛邂逅論心喜有君  
數日未多還捨我相看愁思亂於雲

解使事泊棠陰時三弟皆在京師二首

始吾泊棠陰三子不在舟今當捨之去三子還遠遊茫  
然千里水今見荻花洲俛仰換春冬紛紛空百憂懷哉  
山川異往矣霰雪稠登高一涕泗寄此寒江流



二

泊船棠陰下灘水清且淺回首望孤城浮雲一何緬久  
留非吾意欲去猶繾綣馳心故人側一望三四反蕭蕭  
東堂竹異日留息偃無恩被南國疑此行當翦

驊騮

龍德不可係變化誰能謀

此一本無  
此二句

驊騮亦駿物卓犖地

上遊怒行追疾風忽忽跨九州轍迹古所到山川畧能  
周鴻蒙無人梯沆漭遠天浮巉巖拔青冥仙聖所止留



欲往輒不能視龍乃知羞

寄朱氏妹

昔來高郵居我始得朱子從容談笑間已足見奇偉行  
尋城陰田坐釣渠下汴歸來同食眠左右皆圖史入視  
爾諸幼歡言亦多社當時獨張倩遠在廬山趾沈君未  
言昏名已習吾耳安知十年來乖隔非願始相逢輒念  
遠悲吒多於喜今茲豈人力所念皆聚此諸甥昔未有  
滿眼秀而美低徊吾親側亦足慰勞止嗟予迫時恩一



傳日千里爾舟亦已戒五兩翩然起蕭蕭東南縣望爾  
何時已空知夢為魚逆上西安水

贈陳君景初

吾嘗竒華佗腸胃真割剖神膏既傳之頃刻活殘朽昔  
聞今則信絕伎世嘗有堂堂潁川士察脉極淵數珍丸  
起病瘠鱗蟲隨泄嘔攣足四五年下針使之走一言儻  
不合萬金莫可誘又復能賦詩往往吹瓊玖卷紙誇速  
成語怪若神授名聲動京洛蹤跡晦葭莠相逢但長嘯



遇飲輒掩口獨醒竟何如無乃寡俗偶顧非避世翁疑  
是壁中叟安得斯人術付之經國手

贈張康

昔在歷陽時得子初江津手中紫團參一飲寬吾親捨  
舟城南居杖屨日相因百口代起伏呻呼聒比鄰叩門  
或夜半屢費藥物珍欲報恨不得腸胃盤車輪今逢又  
坎坷令子馳風塵顛倒車馬間起先冰雪晨嗟我十五  
年得祿尚辭貧所讀漫累車豈能蘇一人無求愧子義



有施慙子仁逝將收桑榆邀子寂寞濱

送程公闢守洪州

畫船插幟搖秋光鳴鏡傳鼓水洋洋豫章太守吳郡郎  
行指斗牛先過鄉鄉人出郭航酒漿魚鱉鱸魚炊稻粱  
笑頭肥大菱腰長醕醕喧呼坐滿床怪君三年滯瞿塘  
又驅傳馬登太行纓旄脫盡歸大梁翻然出走天南疆  
九江左投貢與章揚瀾吹漂浩無旁老蛟戲水風助狂  
盤渦忽圻千丈強君聞此語悲慨慷迎吏乃前持一觴



鄱州歷選多傷良鎮撫時有諸侯王拂天高閣朱鳥翔

西山蟠繞鱗鬣蒼下視城塹真金湯雄樓傑屋鬱相望

中戶尚有千金藏漂田種杭出穰穰沉檀珠犀雜萬商

大舟如山起牙樯

一本無此一句

輸瀉交廣流荆揚輕裙利屐

列名倡春風蹋謠能斷腸平湖灣塢煙渺茫樹石珍怪

花草香幽處往往聞笙簧地靈人秀古所臧勝兵可使

酒可嘗十州將吏隨低昂談笑指麾回雨暘非君才高

力方剛豈得跨有此一方無為聽客欲霑棠使君謝吏



趣治裝我行樂矣未渠央

鳳凰山

驅馬信所適落日望九州青山滿天地何往為吾丘貧  
賤身祇辱富貴道足羞涉世諒如此惜哉去無由

夢中作

青門道北雲為屋大壚貯酒千萬斛獨龍注雨如車軸  
不畏不售畏不續

彭蠡



茫茫彭蠡春無地白浪春風濕天際東西揆棹萬舟回  
千歲老蛟時出戲少年輕事鎮南來水怒如山帆正開  
中流蜿蜒見脊尾觀者膽墮予方咤衣冠今日龍山路  
廟下沽酒山前住老矣安能學飲飛買田欲棄江湖去

牛渚

歷陽之南有牛渚一風微吹萬舟阻華戎蠻蜀支百川  
合為大江神所躔山盤水怒不得泄到此乃有無窮淵  
朱衣乘車作官府操制生殺非無權陰靈祕怪不欲露



燬犀得禍豈偶然

東門

東門白下亭推甃蔓寒葩淺沙杙素舸一水宛秋蛇  
漁商數十室門巷隱桑麻翰林謫仙人往歲酒姥家  
調笑此水上能歌楊白花楊花飛白雪枝裹綠煙斜  
舞袖卷煙雪綺裘明紫霞風流翳蓬顯故地使人嗟  
迢迢陌頭青空復可藏鴟

和王微之登高齋三首



寒雲沈屯白日埋河漢蕩圻天如篴衡門兼旬限泥潦  
卧聽竅木鳴相挨蕭辰忽掃纖翳盡北嶺初出青鬼鬼  
微之新詩動我目爛若火齊金盤堆想攜諸彥眺平野  
高論歷詆秦以來觥船淋浪始快意忽憶歸雲胡為哉  
念君少壯輟游衍發揮春秋名玉杯書成不得斷國論  
但此空語傳八垓登臨興罷因感觸更欲遠引追宗雷  
君知富貴亦何有謠譽未足償譏排風豪雨橫費調燮  
坐使髮背為黃台留賓往往夜叅半雖有罇俎無由開



江南佳麗非一日况乃故園名池臺能招過客飲文字  
山水又足供歡哈剩留官屋貯酒母取醉不竭當如淮

二

六朝人物隨煙埃金輿王几安在哉鍾山石城已寂寞  
祇見江水雲端來百年故老有存者尚憶世宗初伐淮  
魏王兵馬接踵出旗纛千里相搪挨當時謀臣非不衆  
上國拔取多陪臺龍騰九天跨四海一水欲阻為可哈  
降王北歸樓殿圻棄屋尚鎖殘金堆神靈變化自真主



將帥何力求公台山川清明草木靜天地不復屯雲雷  
使君登高訪古昔傷此陳迹聊持杯因留嘉客坐披寫  
鄙渌笑語傾如篴酒酣重惜功業晚老矣萬卷徒兼該  
攢峰列壑動歸興憂端落筆何崔嵬餘年無歡易感激  
亦愧莊叟能安排青燈明滅照不寐但把君詩闔且開

三

干戈六代戰血埋雙闕尚指山崔嵬當時君臣但兒戲  
把酒空勸長星杯臨春美女閉黃壤玉枝自一作藥繁



如堆後庭新聲散樵牧興廢倏忽何其哀咸陽龍移九州圻遺種變化呼風雷蕭條中原碣無水崛強又此憑江淮廣陵衣冠掃地去穿築隴畝為池臺吳儂傾家助經始尺土不借秦人篋珠犀磊落萬艘入金壁照耀千門開建隆天飛跨兩海南發交廣東溫台中間葉葉地無幾欲久割據誠難哉靈旗指麾盡貔虎談笑力可南山排樓船蔽川莫敢動扶伏但有謀臣來百年滄洲自潮汐事往不與波爭迴黃雲荒城失苑路白草廢時空



壇垓使君新篇韻險絕登眺感悼隨朝咍嗟予愁憊氣  
已竭對壘每欲相劇挨揮毫更想能一戰數窘乃見詩  
人才



臨川文集卷六



欽定四庫全書

臨川文集卷七

宋 王安石 撰

古詩

董伯懿示裴晉公平淮右題名碑詩用其韻和酬  
用王微之韻和酬即事書懷

和仲求即席分題得庶字

出鞏縣

書任村馬鋪



葛蘊作巫山高愛其飄逸因亦作兩篇

西風

久雨

和王勝之雪霽借馬入省

和吳冲卿鷗鳴樹石屏

送李宣叔倅漳州

送裴如晦宰吳江

韓持國從富并州辟



寄吳冲卿

韓持國見訪

思王逢源

登景德塔

和劉貢甫燕集之作

寄王逢原

寄正之

思古



惜日

送裴如晦即席分題三首

董伯懿示裴晉公平淮右題名碑詩用其韻和酬  
元和伐蔡何危哉朝廷百口無一諧盜傷中丞偶不死  
利劍白日投天街裏瘡入相議軍旅國火一再更檀槐  
上前慷慨語發涕誓出按撫除睽乖指撝光顏戰洄曲  
闕如怒虎搏虺豺獍能捕虜取肝鬲護送密乞完形骸  
咎兵夜半投死地雪濕不敢燃薪爇空城豎子已可縛



中使尚作唬兒哇退之道此尤雋偉當鏤玉牒東燔柴  
欲編詩書播後嗣筆墨雖巧終類俳唐從天寶運中圮  
廊廟往往非忠佳諸侯縱橫代割據疆土豈得無離依  
德宗末年懲戰禍一矢不試塵蒙鞞憲皇初起衆未信  
意欲立掃除昏霾追還清明救薄蝕屢勅主府拘窮蛙  
王師傷夷征賦窘千里亦忌毫釐差小夫偷安自非計  
長者遠慮或可懷桓桓晉公忠且壯時命適與功名偕  
是非末世主成敗烜赫今古誰譏排賢哉韋純議北赦



倉卒兩伐尤難皆重華聲名彌萬國服苗干羽舞兩階  
宣王側身內修政常德立武能平淮昔人經綸初若緩  
欲棄此道非吾儕千秋事往蹤跡在嶽石款記如湘崖  
文嚴字麗皆可喜黃埃蔽沒蒼蘚埋當時將佐盡豪傑  
想此兵禱陪祠齋君曾西遷為拓本濡麝割蜜親劇揩  
新篇波瀾特浩蕩把卷熟讀迷津涯褒賢樂善自為美  
當挂廟壁為詩牌

用王微之韻和酬即事書懷



秦惜逝者耄晉嘉良士休古人皆好樂哀此歲月道嗟  
我抱愁毒殘年自羈囚但為免得蹄非復天上鷗雖知  
林塘美欲往輒回輶名園一散策笑語隨觥籌探題遶  
梅花高詠接應劉宿雨洗荒塹寒蛟沈老湫汭洄信畫  
舸歸路子城幽冬風不改綠忽見新陽浮歡事去如夢  
嘉時念難留明發得君句謂將續前遊語我飲倡樂不  
如詩獻酬淮洲奏鐘磬雅刺德不猶文墨有真趣荒淫  
何足收來篇信時女窈窕衆所求茲理儻可諧華簪為



君抽

和仲求即席分題得庶字

刀筆漫無營圖書紛不御平生攜手人邂逅賞心處名  
卿邵朱邑膚使超嚴助都官富篇章博士熟經據豈特  
好微言又多知大慮從容故天幸倜儻盡人譽千艘來  
交荆萬舸去揚豫良無此嘉客式飲吾所庶

出鞏縣

昭陵落月煙霧昏篝火度谷行山根投鞭委轡涉數村



寤出鞏縣城東門向來宮闕不可見但有洛水流渾渾

書任村馬鋪

兒童繫馬黃河曲近岸河流如可掬任村炊米朝食魚  
日暮滎陽驛中宿投老經過身獨在當時洲渚今平陸  
秣黍冥冥十數家仰視荒蹊但喬木冰盤果美客自知  
起看白水還東馳爾來百口皆年少歸與何人共此悲

葛蘊作巫山高愛其飄逸因亦作兩篇

巫山高十二峯上有往來飄忽之猿猱下有出沒灩澦



之蛟龍中有倚薄縹緲之神宮  
神人處子冰雪容吸風  
飲露虛無中千歲寂寞無人逢  
邂逅乃與襄王通丹崖  
碧嶂深重重白月如日明房  
襲象牀玉几來自從錦屏  
翠幔金芙蓉陽臺美人多楚語  
祇有纖腰能楚舞爭吹  
鳳管鳴鼉鼓那知襄王夢時事  
但見朝朝暮暮長雲雨

二

巫山高偃薄江水之滔滔水於天下實至險山亦起伏  
為波濤其巔冥冥不可見崖岸斗絕悲猿猱赤楓青櫟



生滿谷山鬼白日樵人遭窈窕陽臺彼神女朝朝暮暮  
能雲雨以雲為衣月為褚乘光服暗無留阻崑崙曾城  
道可取方丈蓬萊多伴侶塊獨守此嗟何求况乃低徊  
夢中語

西風

少年不知秋喜聞西風生老大多感傷畏此蟋蟀鳴况  
乃捨親友抱病獨遠行中夜卧不周惻惻感我情起視  
天正黑弱雲亂縱橫似有霰雪飄不復星斗明時節忽



如此重令壯心驚，諒無同憂人樽酒安可傾。

久雨

煤炧著天無寸空白沫，上岸吹魚龍義和推車出不得。  
河伯欲取山為宮，城門晝閉眠百賈。飢孫得糟夜哺翁，  
老人慣事少所怪。看屋箕踞歌南風。

和王勝之雪霽借馬入省

泥水填馬不受轍，瓦雪得火猶藏溝。宿霧紛紛度城闕，  
朔氣凜凜吹衣裘。窮閭閉門無一客，剝啄驚我有前驕。



強隨傳呼出屋去鼻息凍合髭繆繆投韁馬鬣任欹側  
欲出操箒手還抽行思江南悲故事溪谷冬煖花常流  
前年臘歸三見白霽色嶺上斑斑留杖藜此時將邑子  
登眺置酒身優游豈如都城今日事祇恐一蹶為親憂  
因知田里駕款段昔人豈即非良謀君家洛陽名實大  
談笑枯槁回春柔平生意氣故應在白髮未敢相尋求  
從容退食想佳節豈無歌聲相獻酬奈何亦作苦寒調  
歎息朝夕無驂騑超然遂有江湖意滿紙為我書窮愁



相如正應居客右子路且莫乘桴浮

和吳沖卿鵑鳴樹石屏

寒林昏鵑相與還下有跂石蒼孱顏曾於古圖見髣髴  
已怪刀筆非人間君家石屏誰為寫古圖所傳無似者  
鵑飛歷亂止且鳴林葉慘慘風煙生高齋日午坐中見  
意似落日空上行君詩雄盛付君手云此非人乃天巧  
嗟哉渾沌死乾坤至造作萬物醜妍巨細各有理問此  
誰主何其精恢奇譎詭多可喜人於其間乃復雕鑿刻



畫出智力欲與造化追相傾拙者婆婆尚欲奮工者固  
已窮夸矜吾觀鬼神獨與人意異雖有至巧無所爭所  
以號山間埋沒此寶千萬歲不為見者驚吾又以此知  
妙偉之作不在百世後造始乃與元氣并畫工粉墨非  
不好歲久剥爛空留名能從太古到今日獨此不朽由  
天成世人尚竒輕賃力山珍海怪採掇今欲索此屏後  
出為君得胡賈欲價著不識吾知金帛不足論當與君  
詩兩相直



送李宣叔倅漳州

關山到漳窮地與南越錯山川鬱霧毒瘴癘春冬作荒  
茅簷竹間蔽虧有城郭居人特鮮少市井宜蕭索野花  
開無時蠻酒持可酌窮年不用客誰與分杯杓朝廷尚  
賢俊磊砢充臺閣君能喜節行文藝又該博超然萬里  
去識者為不樂予聞君子居自可救民瘼苟能禦外物  
得地無美惡似聞最南方北客今勿藥林麓換風氣獸  
蛇凋毒蟲如漳猶近州氣冷又銷鑠珍足海物味其厚



不為薄章舉馬甲柱固已輕羊酪蕉黃荔子丹又勝楂  
梨酢逢衣比多士往往在邱壑從容與笑語且不慰寂寞  
太守好觴詠嘉賓應在幕想即有新詩流傳至京洛

送裴如晦宰吳江

霜一作震

澤與天杳旁臨無限情他時散髮處最愛垂虹

亭飄然平生遊捨我戴吳星欲往獨不得都門看揚舲  
到縣問疾苦為予求所經當知耕牧地往往芟蒲青三  
江斷其二泝水何由寧微子好古者此歌尚誰聽



韓持國從富并州辟

韓侯冰玉人不可塵土雜官雖衆俊後名字久訇磕并  
州天下望撫士威愛愜千金棄不惜賓客常滿閣遙聞  
餘風高為子置一榻親交西門餞百馬驕雜還子材宜  
用世談者為鳴喑矧今名主人氣力足呵欲推賢為時  
輔勢若朽易拉會當薦還朝立子在閭闔惜哉秣騏驥  
賦以升龠合咨予栖栖者氣象已摧塌他年佐方州說  
將尚不納況於聲勢尊豈易取酬答有如持寸莛未足



感韞韞顧於山水間意願多所合匡廬與韶石少小已  
嘗蹋風遊會稽春雪宿天柱臘淮湖江海上慣食蝦蟹  
蛤西南窮岷嶓東北盡濟漂身雖未嘗歷魂夢已稠沓  
荆溪最所愛映燭多廟塔溪果點丹漆溪花團繡菴扁  
舟信所過行不廢樽榼一從捨之去霜雪行滿領思之  
不能寐戚若蚩蚩嚙方將築其濱畢景謝嚙啗安能孤  
此意顛倒就哀颯唯予余所嚙嗜好比鷓鴣何時歸相  
過遊履尚可蠟



寄吳沖卿

物變極萬殊心通纔一曲讀書謂已多撫事知不足與  
君語承華念此非不夙恨無數頃田歸耕使成熟當官  
拙自計易用忤流俗窮年走區區得謗大於屋歸來汗  
省舍又繼故人躅相逢祇數步吏按常填目切磋非無  
傷阻濶嗟何速孤危失所助把卷常恨獨虛名終自誤  
謬恩何見感清明有沖卿與美如晦叔時謂當選升屈  
指尚五六揆才最不稱饗寵寧無慙殷勤故人書紙尾



又見勗君雖好德言我自望忠告易稱動不括傳論大明服進為非成材罪恐不容贖歲殘東風生陝樹塵翳麴何緣一杯酒談笑相追逐

韓持國見訪

余生非匏瓜於世不無求弱力憚耕稼衣食當周流起家始二十南北今白頭愁傷意已敗罷病恐難瘳江湖把一節屢乞東南州治民豈吾能閒僻庶可偷謬恩當徂冬黽勉始今秋豈敢事高蹇茫然乖本謀撫心私自



憐仰屋竊歎嗷強騎黃飢馬欲語將誰投賴此城下宅  
數蒙故人留攬衣坐中庭仰視白雲浮白雲御西風一  
一向滄洲安得兩黃鵠跨之與雲遊

思王逢原

自吾失逢原觸事輒愁思豈獨為故人撫心良自悲我  
善孰相我孰知我瑕疵我思誰能謀我語聽者誰朝出  
一馬驅暝歸一馬馳驅不自得談笑強追隨仰屋卧  
太息起行涕淋漓念子冢上土草茅已紛披婉婉婦且



少皞一女嫠高義動閭里尚聞致財貲嗟我衣冠朝  
略能具饘糜葬祭無所助哀顏亦何施聞婦欲北返跂  
予常望之寒汴已閉口此行又參差又說當產子產子  
知何時賢者宜有後固當夢熊羆天方不可恃我願適  
在茲我疲學更誤與世不相宜宿昔心已許同岡結茅  
茨此事今已矣已矣尚誰知渺渺江與潭茫茫山與陂  
安能久竊食終負故人期

登景德塔



放身千仞高北望太行山已屋如螳豸蔽虧塵霧間念  
此屋中人當復幾人閑雞鳴起四散暮夜相與還物物  
各自我誰為賢與頑賤氣即易凌貴氣即難攀愧予心  
未齊俛首一破顏

和劉貢甫燕集之作

馮侯天馬壯不羈韓侯白鷺下清池劉侯羽翰秋欲擊  
吳侯葩萼春爭披沈侯玉雪照人潔蕭灑已見江湖姿  
唯予貌醜駭公等自鏡亦正如蒙俱忘形論文喜有得



杯酒邂逅今良時心親不復異新舊便脫巾屨相諧嬉  
空堂無塵小雨定濃綠翳水浮秋曦高談四坐掃炎熱  
木末更送涼風吹此歡不盡忽分散明月照屋空參差  
平明餘清在心耳洗我重得劉侯詩劉侯未見聞已熟  
吾友稱誦多文辭才高意大方用世自有豪俊相攀追  
浴予後會恐不數魂夢久向東南馳何時扁舟却顧我  
還欲迎子遊山陂

寄王逢原



北風吹雲埋九垓草木零落空池臺六龍避逃不敢出  
地上獨有寒雀嵬披衣起行愁不悵歸坐把卷闔且開  
永懷古人今已矣感此近世何為哉申韓百家蕪火起  
孔子大道寒於灰儒衣紛紛欲滿地無復氣燭空煤炧  
力排異端誰助我憶見夫子真奇材梗枿豫章概白日  
祇要匠石聊穿裁我方官拘不得往子有閑暇宜能來  
晤言相與入聖處一取萬古光芒迴

寄正之



少時已感韓子詩東西南北俱欲往新年尤覺此語悲  
恨無羽翼超惚恍肺肝欲絕形骸外涕淚自落衣巾上  
此憂難與世共知憶子論心更惆悵

思古

古之士方窮材行已云貴大臣公聽采左右不得蔽或  
從蒿藜間入據廊廟勢小夫不敢望云我非其彙朝遊  
僞者羞暮出逢者避所以後世愚人人願高位

惜日



白日照四方當在中天留春風地上行當與時周遊和  
氣所披拂槁乾却濕柔愛欲傳萬物勢難停一州棲棲  
孔子者惜日此之由不能使此邦利澤施諸侯豈若駕  
以行使我遇者稠當時三千人齊宋楚陳周小者傳吾  
粗大能傳真幽道散學以聖衆源乃常流吾初如匏瓜  
彼亦孰知丘唯士欲自達窮通非外求暨必相天子乃  
能經九疇行雖恥強勉閉戶非良謀

送裴如晦即席分題三首

以黯然消魂惟別而已  
為韻擬而惟字韻作



飄然五湖長昨日國子師綠髮約略白青衫欲成緇牽  
舟推河水去與山水期春風垂虹亭一杯湖上持傲兀  
何賓客兩忘我與而能復記此飲詩成酒淋漓

二

十月款水冰問君行何為行不顧斗米自與五湖期平  
生湖上遊幽事略能知此後君最樂窮年得游嬉彩鯨  
抗波濤風作鱗之而鳴鼓上洞庭笑看紅橘垂漠漠大  
梁下黃沙吹酒旗應憐故人愁回首一相思



三

邂逅君子堂一杯相與持便應取酩酊萬事不足惟平  
明蔡河風回首成差池獨我漫浪者尚得行相追磨刀  
鱠嚴冬宿昔少陵詩還當捕鱸魚載酒與我期甫里松  
菊盛洞庭相橘垂文章為我唱不數陸與皮

臨川文集卷七



欽定四庫全書

臨川文集卷八

宋 王安石 撰

古詩

兩馬齒俱壯

春從沙磧底

晨興望南山

結屋山澗曲

朝日一暴背



黃菊有至性

少狂喜文章

三戰敗不羞

少年見青春

白日不照物

草端無華滋

一日不再飯

秋枝如殘人



青青西門槐

天下不用車

山田久欲拆

聖賢何常施

散髮一扁舟

道人北山來

今日非昨日

秋日不可見



騏驎在霜野

悲哉孔子沒

秋庭午吏散

秋日在梧桐

我欲往滄海

前日石上松

日出堂上飲

兩馬齒俱壯



兩馬齒俱壯自驕千里材生姿何軒軒或是龍之媒一  
馬立長衢顧影方徘徊一馬裂銜轡犇嘶逸風雷立豈  
飽芻豆戀棧常思迴犇豈欲野齧久羈美駕駘兩馬不  
同調各為世所猜問之不能言使我心悠哉

春從沙磧底

春從沙磧底轉上青天際靄靄桑柘墟浮雲變姿媚游  
人出暄暖鳥語辭陰翳心知歸有日我亦無愁思所嗟  
獨季子尚客江湖滯萬里卜鳳凰飄飄何時至



晨興望南山

晨興望南山不見南山根  
草樹露顛頂樛枝空復繁  
銅瓶取井水已至尚餘溫  
天風一吹拂的皜成璵璠

結屋山澗曲

結屋山澗曲挂瓢秋樹顛  
鳴不中律呂時時驚我眠  
吾兒亦惡聒勦力事棄捐  
止我為爾歌不如恣其然  
狂風動地至萬竅各啾喧  
一瓢雖易除豈在有無間  
皜皜山下石泠泠手中弦  
臨流寫所愛坐聽以窮年



朝日一暴背

朝日一暴背欣然忘夜寒  
樵松煮澗水既食取琴彈  
彈作南風歌歌罷坐長歎  
寤彼栖栖者遺世良獨難

黃菊有至性

團團城上日秋至少光輝積陰欲滔天  
況乃草木微黃菊有至性孤芳犯群威  
采采霜露間亦足慰朝饑

少狂喜文章

少狂喜文章頗復好功名  
稍知古人心始欲老蠶耕低



但志食邂逅亦專城仰慙冥冥士俯愧擾擾昨良夜  
未遽央青燈數寒更撥書置左右仰屋慨平生

三戰敗不羞

三戰敗不羞一官遷輒喜古人思慰親愧辱寧在已於  
陵避兄食織屨仰妻子恩義有相權潔身非至理

少年見青春

少年見青春萬物皆嫵媚身雖不飲酒樂與賓客醉一  
從鬢上白百不見可喜心腸非故時更覺日月駛聞歡



已倦往得飽還思睡春歸只如夢不復悲憔悴寄言少年子努力作春事亦勿怪衰翁衰強自然異

白日不照物

白日不照物浮雲在寥廓風濤吹黃昏屋瓦更紛泊行觀蔡河上負土私力弱隋堤散萬家亂若春蠶箔仍聞決數道且用寬城郭婦子夜號呼西南漫為壑

草端無華滋

草端無華滋陰氣已盤固暄妍却如春歲晚曾不寤一



裘可以暖貧士終難豫忽忽遠枝空寒蟲欲坏戶

一日不再飯

一日不再飯飯已八九眠忽忽返照間頓羸不可遷筋骸微纏束肺腑鼎鑪煎長往理不惜高堂思所牽

秋枝如殘人

秋枝如殘人顏色先憔悴微寒吹已空性命一何脆寧當記疇昔葩葉相嫵媚歲行誰使然好殺豈天意

青青西門槐



人情甘阿諛我獨倦請謁尤於權門疎萬事亦已拙平  
生江湖期夢寐不可遏青青西門槐少解馬上睇

天下不用車

天下不用車人人乘馬馳王良雖善御攬轡欲從誰漢  
武伐大宛殺人若京坻孝文却走馬獨行先安之萬物  
命在天取舍各有時陰陽更用事冬暖豈所宜卞氏強  
獻玉兩剛亦已癡幸終遇良工已剖得不疑

山田久欲拆



山田久欲拆秋至尚求雨婦女喜秋涼踏車多笑語朔  
雲卷衆水慘淡吹平楚橫陂與直塹疑即沒洲渚霍霍  
反照中散絲魚幾縷鴻蒙不可問且往知何許歛眠露  
下舸側見星月吐龍骨已嘔啞田家真作苦

聖賢何常施

聖賢何常施所遇有伸屈曲士守一隅欲以齊萬物喪  
非不欲富言為南宮出世無子有子誰敢救其失

散髮一扁舟



散髮一扁舟夜長眠屢起秋水瀉明河迢迢藕花底愛  
此露的皪復怜雲綺靡諒無與歌絃幽獨亦可喜

道人北山來

道人北山來問松我東岡舉手指屋脊云今如此長開  
田故歲收種果今年嘗告叟去復來耘鋤尚康強死狐  
正首丘遊子思故鄉嗟我行老矣墳墓安可忘

今日非昨日

今日非昨日昨日已可思明日異今日如何能勿悲當



門五六樹上有蟬鳴枝朝聽尚壯急暮聞已衰遲仰看  
青青葉亦復少華滋萬物同一氣固知當爾為我友南  
山居笑談解人頤分我秋栢實問言歸何時衣冠污窮  
塵苟得猶苦飢低徊歲已晚恐負平生期

秋日不可見

秋日不可見林端但餘黃杖藜思平野俛仰畏無光栗  
栗澗谷風吹我衣與裳娟娟空山月照我冠上霜

騏驥在霜野



騏驥在霜野低徊向衰草入櫪聞秋風悲鳴思長道黃  
金作鞭轡粲粲空外好人生貴得意不必恨枯槁

悲哉孔子沒

悲哉孔子沒千歲無麒麟蚩蚩盡鉏耰此物誰能珍漢  
武得一角燔烹誣鬼神更以鑄黃金傳夸後世人

秋庭午吏散

秋庭午吏散予亦歸息偃豈無嘉賓客欲往心獨懶北  
窓古人篇一讀三四反悲哉不蚤計失道行晚晚



秋日在梧桐

秋日在梧桐轉陰如急轂冥冥蔽中庭下視今可暴高  
蟬不復嘯稍得寒鷗宿百遶有衰翁行歌待春綠

我欲往滄海

我欲往滄海客來自河源手探囊中膠救此千載渾我  
語客徒爾當還治崑崙歎息謝不能相看涕灑盆客止  
我且往濯髮扶桑根春風吹我舟萬里空目存

前日石上松



前日石上松斲移沙水際青青折釵股俯映幽人砌  
蟠根今鬯茂落子還蒼翠三年一楮葉世事真期費

日出堂上飲

日出堂上飲日西未云休主人笑而歌客子歎以慙  
指此堂上柱始生在巖幽雨露飽所滋凌雲亦千秋  
所託願求久何言值君收乃令卑濕地百蟻上窮  
鏤丹青空外好鎮壓已堪憂為君重去之不使一  
蟻留蟻力雖云小能生萬虬蟬又能高其礎不爾  
繼者稠語客且勿然



百年等浮漚為客當酌酒何豫主人謀

臨川文集卷八



欽定四庫全書

臨川文集卷九

宋 王安石 撰

古詩

孔子

揚雄二首

漢文帝

秦始皇

韓信



叔孫通

東方朔

揚劉

臧倉

田單

戴不勝

陸忠州

開元行



相送行效張籍

陰漫漫行

一日歸行

汴水

陰山畫虎圖

杜甫畫像

吳長文新得顏公壞碑

荅揚州劉原甫



寄鄂州張使君

送元厚之待制知福州

悼四明杜醇

哭梅聖俞

遊章義寺

飯祈澤寺

答瑞新十遠

送文學士倅邛州



送宋中道通判洺州

送張公儀宰安豐

送陳諤

送孫長倩歸輝州

送喬執中秀才歸高郵

雲山詩送正之

孔子

聖人道大能亦博學者所得皆秋毫雖傳古未有孔子



蟻蠓何足知天高桓魋武叔不量力欲撓一草搖蟠桃  
顏回已自不可測至死鑽仰忘身勞

揚雄二首

子雲游天祿華藻銳初學覃思晚有得晦顯無適莫寥  
寥鄒魯後於此歸先覺豈嘗知符命何苦自投閣長安  
諸愚儒操行自為薄謗嘲出異已傳載因疏略孟軻勸  
伐燕伊尹干說亳叩馬觸兵鋒食牛要祿爵少知羞不  
為況彼皆卓犖史官蔽多聞自古喜穿鑿



二

子雲平生人莫知知者乃獨稱其辭今尊子雲者皆是  
得子雲心亦無幾聖賢樹立自有師人知不知無以為  
俗人賤今常貴古子雲今存誰女數

漢文帝

輕刑死人衆喪短生者偷仁孝自此薄哀哉不能謀露  
臺惜百金灞陵無高丘淺恩施一時長惠被九州

秦始皇



天方獵中原狐兔在所憎傷哉六孱王當此驚鳥膺搏  
取已掃地翰飛尚憑凌遊將跨蓬萊以海為丘陵勒石  
頌功德群臣助驕矜舉世不讀易但以刑名稱蚩蚩彼  
少子何用辨堅冰

韓信

韓信寄食常歎然邂逅漂母能哀憐當時噲等何由伍  
但有淮陰惡少年誰道蕭曹刀筆吏從容一語知人意  
壇上平明大將旗舉軍盡驚王不疑掾兵半楚淮半沙



一作搏兵擊  
楚灘半涉

從初龍且聞信怯鴻溝天下已橫分談笑  
重來卷楚氛但以怯名終得羽誰為孔費兩將軍

叔孫通

先生秦博士秦禮頗能熟量主欲有為兩生皆不欲草  
具一王儀群豪果知肅黃金既徧賜短衣亦已續儒術  
自此凋何為反初服

東方朔

平原狂先生隱翳世上塵材多不可數射覆亦絕倫談



辭最詆怪發口如有神以此得親幸賜予頗不貧金玉  
本光瑩泥沙豈能堙時時一悟主驚動漢庭臣不肯下  
兒童敢言詆平津何知夷與惠空復忤時人

揚劉

人各有是非犯時為患害唯詩以譎諫言者得無悔汾  
王昔監謗變雅今尚載末俗忌諱繁此理寧復在南山  
詠種豆議法過四罪玄都戲桃花母子受顛沛疑似已  
如此況欲諄諄誨事變故不同揚劉可為戒



臧倉

位在萬乘師孟軻猶不遇豈云貧與賤世道非吾趣意  
行天下福事忤由然去命也固有在臧倉汝何與

田單

湣王萬乘齊走死區區燕田單一即墨掃敵如風旋舞  
鳥怪不測騰牛怒無前飄颻樂毅去磊砢功名傳掘葬  
與剽降論乃愧儒先深誠可奮士王蠋豈非賢

戴不勝



昔在宋王所皆非薛居州區區一不勝辛苦亦何求懷  
祿詎有恥知命乃無憂此士自可憐能復識此不

陸忠州

虞人以士招御者與射比當時尚羞為況乃天下士英  
英陸忠州學問輔明智低徊得坎坷勲業終不遂

開元行

君不聞開元盛天子糾合僞傑披姦猖幾年辛苦補四  
海始得完好無疽瘡一朝寄託誰家子威福顛倒那復



理那知赤子偏愁毒祇見狂胡倉卒起茫茫孤行西萬  
里偏仄歸來竟憂死子孫險不失故物社稷陵夷從此  
始由來犬羊著冠坐廟堂安得四鄙無豺狼

相送行效張籍

一車南一車北身世忽忽俱有役憶昔論心兩綢繆那  
知相送不得留但聞馬嘶覺已遠欲望應須上前坂秋  
風忽起吹泥塵雙目空回不見人

陰漫漫行



愁雲怒風相追逐  
青山滅沒滄江覆  
少留燈火就空床  
更聽波濤圍野屋  
憶昨踏雪度長安  
夜宿木瘤還苦寒  
誰云當春便妍暖  
十日九八陰漫漫

一日歸行

賤貧奔走食與衣  
百日奔走一日歸  
平生歡意苦不盡  
正欲老大相因依  
空房蕭瑟施總帷  
青燈半夜哭聲稀  
音容想像今何處  
地下相逢果是非

汴水



汴水無情日夜流不肯為我少淹留相逢故人昨夜去  
不知今日到何州州州人物不相似處處蟬鳴令客愁  
可憐南北意不就二十起家今白頭

陰山畫虎圖

陰山健兒鞭輻急走勢能追北風及逶迤一虎出馬前  
白羽橫穿更人立回旗倒戟四邊動抽矢當前放蹄入  
爪牙蹭蹬不得施磧上流丹看來濕胡天朔漠殺氣高  
煙雲萬里埋弓刀穹廬無工可貌此漢使自解丹青包



堂上絹素開欲裂一見猶能動毛髮低徊使我思古人  
此地搏兵走戎羯禽逃獸遁亦蕭然豈若封疆今晏眠  
契丹弋獵漢耕作飛將自老南山邊還能射虎隨少年

杜甫畫像

吾觀少陵詩為與元氣侔力能排天幹九地壯顏毅色  
不可求浩蕩八極中生物豈不稠醜妍巨細千萬殊竟  
莫見以何雕鏤惜哉命之窮顛倒不見收青衫老更斥  
餓走半九州瘦妻僵前子仆後攘攘盜賊森戈矛吟哦



當此時不廢朝廷憂常願天子聖大臣各伊周寧令吾  
廬獨破受凍死不忍四海寒飈飈傷屯悼屈止一身嗟  
時之人死所羞所以見公畫再拜涕泗流惟公之心古  
亦少願起公死從之游

吳長文新得顏公壞碑

魯公之書既絕倫歲久更為時所珍荒壇壞冢朽崖屋  
剝落風雨埋煨塵斷碑數尺誰所得點畫入紙完如新  
延陵公子好事者拓取持寄情相親六書篆籀數變改



訓詁後世多失真誰初妄鑿妍與醜坐使學士勞骸筋  
堂堂魯公勇且仁出遇世難親經綸揮毫卓犖又驚俗  
豈亦以此誇常民但疑技巧有天得不必勉強方通神  
詩歌甘棠美名伯愛惜蔽芾由思人時危忠誼常恨少  
寶此勿復令埋堙

答揚州劉原甫

因君古人風  
更欲投吾簪

少食苦不足一官聊自謀為生晚更拙懷祿尚遲留  
勉詎有補強顏色衆羞謂我古人風知君以相優君實



高世才主恩正綢繆寄矣哀此民華簪寧易投

寄岳州張使君

昔人寧飲建業水共道不食武昌魚公來建業每自如  
亦復不厭武昌居武昌山川今可想綠水逶迤煙莽蒼  
白鷗晴飛隨兩槳岸薺茸映魚網投老留連陌上塵  
思公一語何由往

送元厚之待制知福州

海隅山谷間人物最多處平旦息相吹連城默如霧閩



王舊宮室丹漆美無度今為大帥府千里來赴愬元侯  
文章翁更以吏能著我我中天閣鳴玉新改步銜詔出  
梨嶺方為遠人慕旌旗滿流水冠蓋東門駐四坐共咨  
嗟疑侯不當去張仲稱孝友樊侯正求助名城雖云樂  
行矣未宜遽

悼四明杜醇

杜生四五十孝友稱鄉里隱約不外求耕桑有妻子藜  
杖牧雞豚筠筒釣魴鯉歲時沽酒歸亦不乏甘旨天涯



一杯飯夙昔相逢喜談辭足詩書篇詠又清泚都城問  
越客安否常在耳日月未渠央如何棄予死古風久凋  
零好學少爲已悲哉四明山此士今已矣

哭梅聖俞

詩行於世先春秋國風變哀始柏舟文辭感激多所憂  
律呂尚可諧鳴球先王澤竭士已偷紛紛作者始可羞  
其聲與節急以浮真人當天施再流篤生梅公應時求  
頌歌文武功業優經奇緯麗散九州衆皆少銳老則不



翁獨辛苦不能休惜無采者人名適貴人憐公青兩眸  
吹噓可使高岑樓坐令隱約不見收空能乞錢助饋餉  
疑此有物司諸幽棲棲孔孟葬魯鄒後始卓犖稱軻丘  
聖賢與命相楯矛勢欲強達誠無由詩人况又多窮愁  
李杜亦不為公侯公窺窮阨以身投坎軻坐老當誰尤  
吁嗟豈即非善謀虎豹雖死皮終留飄然載喪下陰溝  
粉書軸幅懸無旒高堂萬里哀白頭東望使我商聲謳

遊章義寺



九日章義寺倦遊因解鑣拂榻寄午夢起尋北山椒岑  
蔚鳥絕迹悲鳴唯一蜩歡言與僧期於此共簞瓢斬松  
八九根窻壁具一朝伏檻何所見蒼蒼圍寂寥巖谷寒  
更靜水泉清不搖安得有車馬尚無漁與樵神茂真觀  
復心明衆塵消陰嶺有嘉客儻來不須招

飯祈澤寺

駕言東南遊午飯投僧館山白梅蘂長林黃柳芽短筇  
簪沙際來畧約桑間斷春映一川明雪消千壑漫魚隨



竹影浮鳥誤人聲散翫物豈能留干時吾自懶

答瑞新十遠

遠水悠然碧遠山天際蒼中有山水人寄我十遠章我  
時在高樓徙倚觀八荒亦復有遠意千載不相忘

送文學士倅邛州

文翁出治蜀蜀士始文章司馬唱成都嗣音得王揚  
犖犖漢守孫千秋起相望操筆賦上林脫巾選為郎擁書  
天祿閣奇字校偏傍忽乘駟馬車牛酒過故鄉時平無



諭檄不訪碧雞祥問君行何為關隴正繁霜中和助宣  
布循吏綴前芳豈特為親榮區區夸一方

送宋中道通判洺州

漳水不灌鄴不知幾何時後世有史起乃能為可為余  
嘗憐洺民舄鹵半不治頗覺漳可引但為談者嗤高議  
不同俗功成人始思夫子到官日勿忘吾此詩

送張公儀宰安豐

楚客來時鴈為伴歸期祇待春冰泮鴈飛南北三兩回



回首湖山空夢亂秘書一官聊自慰安豐百里誰復歎  
揚鞭去去及芳時壽酒千觴花爛漫

送陳諤

有司昔者患不公翻名謄書今故密論才相若子獨棄  
外物有命真難必鄉閭孝友莫如子我願卜隣非一日  
朱門奕奕行多慚歸矣無為惡蓬葦

送孫長倩歸輝州

溪澗得雨潦奔溢不可航江海收百川浩浩誰能量溪



澗之日短江海之日長願生畜道德江海以自方

送喬執中秀才歸高郵

薄飯午不羹空爐夜無炭寥寥日避席烈烈風欺幔謂  
予勿惡此何為向子歎長年客塵沙無婦助親爨寒暄  
慰白首我弟纔將冠遭迴歲又晚想見淮湖漫古人一  
日養不以三公換田園在戮力且欲歸鋤灌行矣子誠  
然光陰未宜翫負米力有餘能無讀書伴

雲山詩送正之



雲山參差碧相圍溪水詰曲帶城陴溪窮壤斷至者誰  
予獨與子相諧熙山城之西鼓吹悲水風蕭蕭不滿旗  
子今去此來無時予有不可誰予規

臨川文集卷九



欽定四庫全書

臨川文集卷十

宋 王安石 撰

古詩

和甫如京師微之置酒

別孫莘老

寄丁中允

寶臣

示平甫弟

憶北山送勝上人



相國寺啟同天節道場行香院觀戲者

馬上轉韻

乙巳九月登冶城作

過劉貢甫

估玉

信都公家白兔

車螯二首

與平甫同賦槐



甘棠梨

獨山梅花

同昌叔賦鴈奴

老樹

賦棗

得燭字

飛鴈

寓言九首

舟中讀書



和王樂道讀進士試卷

自訟

彼狂

衆人

和甫如京師微之置酒

季子將北征貂裘解亭臯使君擁鳴騶出餞載酒醪作  
詩寵行色坐客多賢豪信知大夫才能賦在登高陟岵  
憂未已強歌反哀號問言歸何時逮此冬風饕川塗良



阻脩篋戀慎所操黃屋初啟聖萬靈歸一陶詢謀及疎  
賤拔取皆時髦往矣果有合可辭州縣勞

別孫莘老

逢原未熟我已與子相知自吾得逢原知子更不疑把  
手湖上舟望子欲歸時茫然乃分散獨背東南馳寥寥  
西城居邂逅與子期雞鳴入省門朱墨來紛披含意不  
自得強顏聊爾為會合常在夜青燈照書詩往往並衾  
語至明不言疲忽忽捨我去使我當從誰送子不出門



我身方羈縻我心得自如  
今與子相隨隨子至湖上  
逢原所嘗喜想見荷葉盡  
北風卷寒漪已懷今日愁  
更念昔日悲相逢亦何有  
但有鏡中絲

寄丁中允

寶臣

人生九州間泛泛水中木  
漂浮隨風波邂逅得相觸  
始我與夫子得官同一州  
相逢皆偶然情義乃綢繆  
我於人事疎而子久矣修  
磨礪以成我德大不可疇  
乖離今六年念子未嘗休  
豈不道相逢但得頃刻留  
歡喜不滿



顏長年抱離憂古人有所思千里駕車牛如何咫尺間  
而不與予遊顧惜五斗米無辜自拘囚念彼磊落者心  
顏兩慚羞剡山碧榛榛剡水日夜流山行苦無巖水淺  
亦可舟使君子所善來檄自可求何時子來意待子南  
山頭

示平甫弟

汴渠西受崑崙水五月奔湍射黃矢高淮夜入忽倒流  
碕岸相看欲生觜萬檣如山屹不動嗟我仲子行亦止



自聞留連且一月每得問訊猶千里老工取河天上落  
伏礫遭沙卷無底土橋立馬望城東數日知有相逢喜  
牆隅返照媚槐穀池面過雨蘓篁葦欣然把手相與閑  
所願此時無一詭豈無他憂能老我付與天地從今始  
閉門為謝載酒人外慕紛紛吾已矣

憶北山送勝上人

蒼藤翠木江南山激激流水兩山間山高水深魚鳥樂  
車馬跡絕人長閒雲埋樵聲隔葱蒨月弄釣影臨潺湲



黃塵滿眼衣可濯夢寐惆悵何時還

相國寺啟同天節道場行香院觀戲者

侏儻戲場中一貴復一賤心知本自同所以無欣怨

馬上轉韻

三月楊花迷眼白四月柳條空老碧年光如水儘東流  
風物看看又到秋人世百年能幾許何須戚戚長辛苦  
富貴功名自有時簞瓢掉茹亦山雌

乙巳九月登冶城作



欲望鍾山岑因知冶城路躋攀隱木杪稍記曾遊處紅  
沉渚上日蒼起榛中霧卽事有哀傷山川自如故

過劉貢甫

去年約子遊山陂今者仍為大梁客天旋日月不少留  
稱意人間寧易得天明徑欲相就語雲雪填城萬家白  
冬風吹鬣馬更驕一出何由問行迹能言奇字世已少  
終欲追攀豈辭劇枕中鴻寶舊所傳飲我寧辭酒或索  
吾願與子同醉醒顏狀雖殊心不隔故知今有可憐人



回首紛紛斗筭窄

估玉

潼關西山古藍田有氣鬱鬱高挂天雄虹雌霓相結纏  
晝夜不散非雲烟秦人挾斤上其巔視氣所出深鑱鐫  
得物盈尺方且堅以斤試叩聲泠然持歸市上求百錢  
人皆疑嗟莫愛憐大梁老估聞不眠操金喜取走蹢躅  
深藏牢包三十年光怪鄰里驚相傳欲獻天子無由緣  
朝廷昨日鐘鼓縣呼工琢圭寘神筵玉材細瑣不中權



賈孫抱物詔使前紅羅複疊帕紫氎發視紺碧光屬聯  
詔問與價當幾千衆工讓口無敢先嗟我豈識真一作  
庵  
與全

信都公家白兔

水精為宮玉為田姮娥縞衣洗朱鉛宮中老兔非日浴  
天使潔白宜嬋娟揚鬚弭足桂樹間桂花如霜亂後前  
赤鷄相望窺不得空疑兩瞳射日丹東西踣梁自長久  
天畢橫施亦何有憑光下視置罔繁衣褐紛紛漫回首



去年驚墮滁山雲出入虛莽猶無羣奇毛難藏果亦得  
千里今以窮歸君空衢險幽不可返食君庭除嗟亦窘  
令予得為此免謀豐草長林且遊行

車螯二首

車螯肉甚美由美得烹燔殼以無味弃弃之能久存予  
嘗憐其肉柔弱甘咀吞又嘗怪其殼有功不見論醉客  
快一噉散投牆壁根寧能為收拾持用訊醫門

二



車螯肉之弱恃殼保厥身自非身有求不敢微啟唇尚  
恐擲者得泥沙常埋堙往往湯火間身盡殼空存維海  
錯萬物口牙且咀吞爾無如彼何可畏寧獨人無為久  
自苦含匿不暴陳豁然從所如游蕩四海澹清波濯其  
污白日曬其昏死生或有在豈遽得烹燂

與平甫同賦槐

冰雪泊楚岬萬株同飄零春風都城居初見葉青青歲  
行如車輪蔭翳忽滿庭秋子今在眼何時動江舲



甘棠梨

甘棠詩所歌自足誇衆果愛其凌秋霜萬玉懸磊砢園  
夫盛採摘市賈爭包裹車輪動盈箱舟載輒連柁朝分  
不知數暮在知幾顆但使甘有餘何傷小而橢主人捐  
千金飣餼留四坐柑棓與橙栗在口亦云可都城紛華  
地內熱易生火問客當此時蠲煩孰如我

獨山梅花

獨山梅花何所似半開半謝荊棘中美人零落依草木



志士顛顛守蒿蓬亭亭孤艷帶寒日漠漠遠香隨野風  
移栽不得根欲老回首上林顏色空

同昌叔賦鴈奴

鴻鴈無定棲隨陽以南北嗟哉此為奴至性能懇惻人  
將伺其殆奴輒告之亟舉羣寤而飛機巧無所得夜或  
以火取奴鳴火因匿頻驚莫我捕顧謂奴不直嗷嗷身  
百憂泯泯衆一息相隨入矰繳豈不聽者惑偷安與受  
給自古有亡國君看鴈奴篇禍福甚明白



老樹

去年北風吹瓦裂牆頭老樹凍欲折蒼葉蔽屈忽扶疎  
野禽從此相與居禽鳴無時不可數雌雄各自應律呂  
我牀撥書當午眠能驚我眠聒我語古詩鳥鳴山更幽  
我念不若鳴聲收但憂此物一朝去狂風還來欺老樹

賦棗

得燭字

種桃昔所傳種棗予所欲在實為美果論材又良木餘  
甘入鄰家尚得饒婦逐况余秋盤中快噉取饜足風色



墮朱繒日顙皺紅玉贄享古已然幽詩自宜錄緬懷青  
齊間萬樹蔭平陸誰云食之昏匿知乃成俗廣庭觴聖  
壽以此參肴藪願比赤心投皇明儻予燭

飛鴈

鴈飛冥冥時下泊稻梁雖少江湖樂人生何必慕輕肥  
辛苦將身到沙漠漢時蘓武與張騫萬里生還值偶然  
丈夫許國當如此男子辭親亦可憐

寓言九首



誦誦古之士出必見禮樂羣游與羣飲仁義待揚摧心  
疲歌舞荒耳聒米鹽濁所以後世賢絕俗乃為學

二

不得君子居而與小人遊疵瑕不相摩況乃禍釁稠高  
語不敢出鄙辭強顏酌始云避世患自覺日已偷如傳  
一齊人以萬楚人咻云復學齊言定復不可求仁義多  
在野欲從苦淹留不悲道難行所悲累身修

三



周公歌七月耕稼乃王術宣王追祖宗考牧與宮室甘棠能聽訟召伯聖人匹後生論常高於世復何實

四

婚喪孰不供貸錢免爾縈耕收孰不給傾粟助之生物贏我收之物窘出使營後世不務此區區挫兼并

五

貞觀業萬世經營豈非艱其子一搖之宗廟靈幾彈開元始聰明一青奔岷山功高後毀易德薄人存難



六

言失於須臾百世不可除行失几席間惡名滿八區百  
年養不足一日毀有餘諒彼恥不仁戒哉惟厥初

七

鐘鼓非樂本末猶相因仁聲入人深孟子言之醇如  
何貞觀君從古同隋陳風俗不粹美惜哉世無臣

八

遊鯨厭海濁出戲清江湄風濤助翻騰網罟不敢窺失



身洲渚間螻蟻乘其機物大苦易窮一窮無所歸

九

猛虎卧草間羣鳥從噪之萬物忌強梁寧獨以其私虎  
終機械得鳥亦彈丸隨山雞不忤物默與鳳凰期

舟中讀書

冉冉木葉下蕭蕭山水秋浮雲帶田野落日抱汀洲歸  
卧無與語出門何所求未能忘感慨聊以古人謀

和王樂道讀進士試卷



文章始隋唐進取歸一律安知鴻都事竟用程人物變  
今嗟未能於已空自咄流波亦已漫高論常見屈故令  
俶儻士往往棄堙鬱臯陶叙九德固有知人術聖世欲  
爾為徐觀異人出

自訟

孔子見南子子路為不怡欲從公山氏勃鬱見色辭道  
如天之蒼萬物不能縑弟子尚不信况予乏才資明知  
古人仁語默各有時苟出不自慎果為聽者疑白圭尚



可磨駟馬猶能追一言成不智雖悔欲何為

彼狂

上古杳默無人聲日月不忒山川平人與鳥獸相隨行  
祖孫一死十百生萬物不給乃相兵伏羲畫法作後程  
漁蟲獵獸寬羣爭勢不得已當經營非以示世為聰明  
方分類別物有名夸賢尚功列恥榮盡偽日巧雕元精  
至言一出衆輒驚上智閉匿不敢成因時就俗救剛黠  
惜哉彼狂以文鳴強取色樂要聾盲震蕩沉濁終無清



詖詭徒亂聖人氓豈若泯默死蠶耕

衆人

衆人紛紛何足競是非吾喜非吾病  
頌聲交作莽豈賢  
四國流言旦猶聖  
唯聖人能輕重  
人不能銖兩為千鈞  
乃知輕重不在彼  
要之美惡由吾身

乾  
鑿  
寶  
山



臨川文集卷十